



蘇晨汀

## 七律 次韻杜甫秋興八首

西國金融危機，夷洋水冷，故國風高，秋風秋雨，愁入詩腸，步韻杜甫秋興八首，或聊抒胸臆。

### 其一

西來秋氣上高林，照水嵯峨落木森。  
雁去衡陽依暖樹，日斜胡馬冷春陰。  
狂飆甫裂陶朱膽，旌旆初懸故國心。  
猶見邊城烽火急，中原何處覓衣砧？

### 其二

吹斷桂香瓊樹斜，卿雲依舊繞京華。  
西邊曲岸沉秋木，月下長安見老槎。  
不獨黎民思八愷，仍然勇士恨胡笳。  
北星迢遞閭闔遠，畫省銅爐寄菊花。

### 其三

秋聲雁斷立餘暉，北望原知壯思微。  
欲逐黃花開故土，猶隨玉燕繞簷飛。  
金衣紫綬心難與，桃李春風意不違。  
惟願仗笻西陸去，花辭顏色草方肥。

### 其四

秋風秋雨歎枯棋，松竹堪同草木悲？  
古澗浮愁流老葉，清歌挽鶴駐春時。  
銅駝廢殿胡人泣，鐵馬新城壯士馳。  
大國紋楸羸不怯，一燈明滅北窗思。

### 其五

半窗初日半窗山，長思猶懸柳陸間。  
去國一身求寶劍，望鄉萬里夢秦關。  
西園樹暗棲殘色，南浦花明帶雨顏。  
漸老廉頗應可用？秋風好借彩雲班。

### 其六

凌雲欲上鳳凰頭，送目香江卻晚秋。  
梧碧青鸞何處覓？橘黃南國幾人愁？  
思賢野岸呼商皓，題鳳夷洋起白鷗。  
安得金弓射胡馬，滿城風雨近幽州。

### 其七

豐城龍劍盛時功，十萬旌旗野望中。  
北地猶馳青海馬，南人更唱魯陽風。  
栽花潘嶽題桃李，醉菊陶公哭晚紅。  
何處五湖天地闊，依然范蠡一漁翁？

### 其八

高窗秋思苦逶迤，菡萏香魂下楚陂。  
過盡仙湖煙落水，飛臨寒浦鳥登枝。  
松吟亂石青長駐，竹倚殘紅綠豈移？  
故國壯心猶子晉，笙歌一曲鳳凰垂。